



ATASSUT

UPA2015/56-1

Siverth K. Heilmann

05.05.2015.

Aalisarnermut immikkoortitat pillugit Inatsisartut inatsisaata al-lanngortinnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni isaterinissamut tapiissutinik akiliuteqarnermi aalisarsinnaaner-mut akuersissutit siunissami atorunaarsinnissaat periarfissaajun-naassalluni.

(Inatsisartunut ilaasortaq Hans Enoksen, Partii Naleraq)

Inatsisartuni ilaasortaq Hans Enoksen, Partii Naleraq, aalajangiiffigisassamik siunnersuutaanut qujavugut imatullu ATASSUT-miit oqaaseqassaagut.

Siunnersuuteqartoq ilumoorpoq, aalisariutaatillit pisoqqanillu angallataatillit, isaterinissamut tapiissutinik pissarsippat, aalisarsinnaanermut akuersissummik pigisalik arsaagassanngorlugu inuussutissarsiutaannillu tunuartussanngorlugit inatsisiliorsimaneq torralataanngilluinnartoq, taamaattumillu aamma allanngortinneqartariaqarnera ATASSUT-miit oqariartuutigisarparput.

ATASSUT-miit oqaluttarfik manna atorlugu oqariartuutigisaannarparput, aalisariuteqassuseq, kinguaariit nikittarnerat, aalisagartassat, aalisakkallu utersaariartuinnarneranni, aalisariutit nutanngilinikut nutarterneqarsinnaaneri minnerunngitsumillu nutaanik taarsersuerusuttunut aqutissiuussinissaq avaqqunneqarsinnaanngitsoq.

Sinerissami qanittumi aalisartut, aningaliissutit killeqaqisut atorlugit tapiisoqarsinnaasarpoq ilaalli aningaaserivinniit erniakkaaqsunik sapiiseqalutik atorlutik napaniarsarippat. Qangatuummi ESU aqutigalugu aningaasaliineq tapiissuteqartarnerillu iluaqutaasaqisoq maannakkut ilaannakuusumik atortinneqarunnaarnikuuvoq. Ajoraluartumillu aalisakkat tammakarmata aalisartunuinnaanngitsoq nunatta karsianut inuinullu eqquinerlorujussuarpoq.



Inuit Ataqatigiit 2009-imi Naalakkersuisuutitaqarneranni, aalisarnerup ineriartorteqqinnissaanut ATASSUT-miit, ESU aqutigalugu aningaasaliisinaanermut assingusoq iluatsingajattumik aqutissiuuteriaraluarparput.

Taamanikkulli Naalakkersuisuusut, aningaasaliisussatut isumalluutaanniit raajarniarneq qaleralinniarnelru kisimik imminut akilersinnaasutut isigineqarmat, saarullinniartut aalisakkanillu allanik aalisartut inerisaarusuttullu, imminut akilersinnaangitsutut nalilerneqarmata aningaasaliiffiigiumaneqanngimmatalu ATASSUT-miit tamaviaarsimagaluarpuqut iluatsitsinatali.

Raajat qalerallillu nunatta aningaasarsiorneranut pingaaruteqaraluaqisut, ATASSUT-miit isumaqartuarpugut, sinerissami qanittumi aalisartut inerisaaqqinnissamut ESU-mut assingusumik aningaasaliisaleqqinnissamut puujuinnarneqarsinnaangitsut.

Nunami tunitsiviit naleqqussaraanni aalisakkallu akiisa qaffariartuinnarnissaannut aqutissiuussigutta ATASSUT-miit qularutiginnilarput, siunissami aningaasaliinerit naleqarnerungaartumik utillallarumaarput

Aap aningaasaliinerit tamatigut iluatsittannginneri eqqaamaneqassasut qularutiginnilarput, pingaartumimmi aalisakkat tammakarnerisa nalaanni nalaatsinerlussimanerput aningaasarpassuarnillu naleqartunik aalisariutaatilinnut isumakkeerinnittariaqarsimaneq avaqqunneqarsinnaasimangitsoq inatsisartuni aalajangiisariaqarsimaneq puujorsimangilarput.

Pisutsit allanngoriartorput, siunissarput qaamavoq, niuernermi pisisartullu piumasaat sakkukilliartunngillat. Aalisarnermi kattussuutsinneqarnissaq kisiat siunertarinagu, siunissamili aalisartortagut aqutissiuukkutsigit, aalisarneq imminut akilersinnaasoq nunamilu tunitsivinnik suliffiillu ataavartut pilersiortorutsigit, kikkorpassuit namminneq inerisaanissaminnut aningaasaliisinaanissaannullu aqutissiuutissavagut.

Taamatut oqaaseqarluta aalajangiiffigisassatut siunnersuut ATASSUT-miit taperserparput, piumasarissallugulu suliap aappassaaneeraneqannginnerani aalisarnermut piniarnermut ataatsimiititaliami peqqissaarullugu suliarineqarnissaa.

